

Jahresbericht 2022

zuhanden der 50. Mitgliederversammlung vom 19. April 2023

1. Spezielle Anlässe

Ä idröcklichi Füehrig händ mir dörfe gniesse
Und luege, wie all die schöna Krütli kond spriesse.

Ned nu dr Garta, o d'Kloschterkircha hät üs gfalla
Und d'Kloschterfrau hät ä paar loschtigi Spröch lo falla.

S'Agebot im Kloschterlada hät üs zum Koofe animiert
Und zum Schluss händ mir no di sälbergmachtena Kueche usprobiert.

Begeischeret, zfrede und bestens gnährt sind wir wieder hei
Ischt das en tolle Alass gse im Kloschter Heiligkrüz im Mai.

Ohni Schmuck, derföör mit Gwändli und Hube usstaffiert
Sind mir im Juni durch d'Zwifel Gnusswerkstatt spaziert.

Was schätzend ihr, wie lang's ächt goht
Bis ä fertigs Säckli Chips entstoht?

Nu 30 Minute duret's, mir händ das könnna mässa
Bis die Chips tatsächlich fertig sind zom Ässa.

Beidrockend ischt die Füehrig gse, das hend mir alli gset
Und zfrede di gföllta Zwifel Gschenksäck häm tret.

Vo Menzinga via Gubel sind mir bis Bad Schönbrunn gloffa
Dr herrlich Sunneschi und die Landschaft händ alles übertroffa.

D'Cecile ischt igsprunga för di krank Ingeborg und hät sich's ned lo ne
Ihres Wössa über Wegkrüz, Kapella und s'Bad Schönbrunn witerzgeh.

Danke Cecile, du häschd di stundelang guet vorbereitet
kompetent häschd du üs durch där schöni Tag begleitet.

Ganz hervorragend gschmeckt hät o uf em Gubel s' Mittagessa
Das z'erwähne möcht i höt ned vergässa.

Das Spiel macht üs Schwizer äfach immer Spass
Richtig, mir redend vomene gmüetliche Jass.

Trofte händ sich a dem Nomittag 28 Stähuser Seniore
Und händ d'Jasskönigin oder dr Jasskönig userkore.

Der Partner wird zueglost, und d'Jassart ischt än Schieber
So ist das Spiel fair und das ischt secher allne lieber

Der Ruedi Balsiger hät sich z'gueterletscht
Erfolgrich als Tagessieger dorigsetzt.

Der Enzo Enea kennend alli, ned nur in Rappi
Drum händ mir so Fröd gha, wo mir gehört händ, die Führig klappi.

25 verschieden Bommarte oder sogar no meh
Händ mir in dem prachvolle Naturmuseum bi schönstem Wetter gseh.

D' Liebe zu all dene Bömm händ mir ganz stark gspört
Und dass ma o die alta ka verpflanza händ mir ghört.

Jeder Bomm hät sini ägeti Gschecht, wo mir ned wärdend vergässa
Und am Schluss händ mir met Bleck uf ä Seeroseteich a Glace gässa.

Vor rund 220 Jahr isch ned Bern d'Hauptstadt gse vo üserem Land
Nei, mä hät 1798 Aarau zur Bundeshauptstadt ernannt.

Noch nu 5 Monat isches z' Aarau verbei gse mit dere grosse Ehr
Aber di historischa Gassa und Giebelhüser gfallend üs no sehr.

O die spotgotischa Hüserreihe sind ä Pracht
Und s'Ässe i dr Altstadt hät üs o ä RieseFröd gmacht

Es ischt viel meh als no die Lüt mit de wisse Socka
Wo üs vo Stähuse könnt gi Aarau locka.

2. Gemeinsam spazieren

Mir wössend's alli, egal ob Alt oder Jung
Regelmässigi Bewegig haltet üs i Schwung

Met Stock und Rollator laufend di ältere Seniore heiter
Jede Mittwoch durch Stähuse mit ihrnä 2 Begleiter

Üser Respekt ghört jedem Senior, egal ob Ma oder Frau
Und da Begleitpersona ghört där gross Reschpekt natürli au

Bewegig tuet guet, kond verbei und probierend's us
Bimene feine Kafi klingt där schöni Morga immer us.

3. Erzählnachmittage

Vier motivirti Fraua lesend 1x pro Monet
Spannendi Gschechta vor – isch das e tolli Gwohnet.

Beliebt isch där Alass bei allne betagte Seniora
Es wird ufmerksam zueglost und alli spitzend ihri Ohra.

S'diskutiere und Kafi trinke ghört natürli o derzue
So händ alli Seniore vo dem schöna Alass no lang ned gnue.

Im Seniorezentrum findet där Nomittag statt
Kond au, es lohnt sich und ischt immer glatt.

4. Kontakte und Gespräche

D'Seniore sind, ihr hörend richtig
För üsere Gmänschaft össerscht wichtig.

Vo ihrer Lebenserfahrig und ihrer Biografie
Kond mir nur lerna, es könnt ned interessanter si

Leider fehlt oft der Partner, d' Seniore sind allei
Drum bsuecht' si d' Beatrice Schweingruber uf ihra Wunsch dehei

Ä Telefon gnüegt und si stoht vor ihrer Töra
Lütend a, si freut sich höt scho, vo eu z'ghöra.